

THEME : IVYEREKEYE INGENE IMANZA ZIKURIKIZWA .

Mu kiganiro co kuri uno musu uri hejuru, tuza kurabira hamwe ivyerekeye ingene imanza zikurikizwa nkuko tubisanga mw'ibwirizwa nimeru 1/10 ryo ku wa 3 Ndamukiza 2013, risubiramwo igitabo c'amategeko yerekeye ingene imanza z'ivyaha zitohozwa, ziburanishwa n'ingene zicibwa.

Mw'ido n'ido ry'ikiganiro, tuza kurabira hamwe ibi bikurikira :

1. Ingingo ngenderwako
2. Ivyerekeye umunyororo w'agatsindikiro
3. Ugukoresha ibikorwa vy'iterambere rusangi abahanywe
4. Ivyerekeye ibibujijwe uwahanywe n'ubutungane.

I. IDO N'IDO RY'IKIGANIRO

I.1. Ingingo ngenderwako.

Ubushikirizamanza ni bwo bujewe gukurikiza imanza ku vyerekeye ibihano, umunyororo w'agatsindikiro, hamwe n'indishi yishuzwa na nyene kuyitsindira. Umwanditsi w'imanza na we, ni we yishuzwa ihadabu, amagarama n'ikori ritangwa ku ndishi ishinzwe na sentare.

Iyo urubanza rutavuga ko uwaciriwe umunyororo aca afatwa ubwo nyene, uwaciriwe igihano ahagarikwa mu gihe ingingo yafashwe itagisubirwamwo.

No mu gihe umucamanza atabitegetse, umunyororo aca afatwa ubwonyene, umushikirizamanza mukuru wa Republika canke umushikirizamanza akukira sentare nkuru isubiramwo, baravye uko urubanza rumeze, babirekuriwe n'umucamanza, igihe ico ari cose, urubanza rumaze gusomwa, barashobora gufatisha uwaciriwe igihano iyo hari imvo zihambaye kandi zidasanzwe, zituma iyo ingingo itegerezwa gufatwa kubera imvo z'umutekano, canke iyo hari ibituma bishemeye vyerekana ko uwaciriwe igihano ashobora gutoroka kugira ngo urubanza ntirukurikizwe. Iyo ingingo itegerezwa kwerekana imvo ziyishigikira.

Ingingo yafashwe n'umucamanza irashobora kwunguruzwa, mu buryo no mu kiringo bitegekanijwe muri rino bwirizwa.

Ubushikirizamanza buca bushikiriza uwaciriwe igihano umukuru w'ibohero azopfungirwamwo, uwo na we agaca atanga urwandiko rwemeza ko amushikirijwe.

Arangije igihano c'umunyoro, uwari yahanywe ategerezwa kurekurwa.

Bisabwe n'ubushikirizamanza, bufatiye ku rubanza rwaciriwe uwahanywe kugira apfungirwe hadabu atatanze canke apfungwe umunyoro w'agatsindikiro, uwahanywe aguma apfunzwe kugeza arangije ico gihano c'ugupfungirwa hadabu atatanze canke ikiringo umunyoro w'agatsindikiro umara canke akaguma mu minwey'ubutegetsu.

Nkuko ingingo ya 283 ibivuga ko umukuru w'ibohero uwaciriwe igihano apfungirwemwo, arafise igitabu kirimo urutonde rw'abanyoro kandi umushikiranganzi ajejwe ubutungane ni we ategukanya ingene kibwirizwa kumera n'ivyandikwamwo.

Mu gihe barekuwe, abanyoro bazi kwandika barashira umukono mu gitabu candikwamwo imbohe. Ku basigaye, umukono ushobora gusubirizwa n'ikindi kimenyetso kibaranga, gisanzwe cemewe ko ari co kimwe n'umukono.

Iyo uwaciriwe igihano yari yatezuriwe umunyoro atanze amahera y'ingwati, sentare yaciye urubanza, ibisabwe n'ubushikirizamanza, ni yo yemeza ko uwo muntu atarengutse kugira urubanza rukurikizwe.

Muri ico gihe, iyo sentare ica ishingira ko ingwati yegukiye isandugu ry'igihugu.

Ingingo ya 285 ivuga ko, ihadabu n'amagarama bitangwa mu minwe y'umwanditsi w'imanza mu kiringo c'iminsi umunani ikurikira umunsi urubanza rubaye ntabanduka.

Bivuye ku ngigo ishinzwe n’umucamanza canke n’umukuru wa sentare yaciye urubanza, ico kiringo kirashobora kwongerezwa.

Umucamanza arashobora gushinga ko ihadabu n’amagarama bitangwa kuva ku muni urubanza rusomwa iyo rwacitse baburanye imbonankubone, canke kuva umuni rumenyeshajwe, iyo rwaciye impaga, igihe bibaza ko uwaciriye igihano yohava atayatanga.

Muri ico gihe, umwanditsi w’imanza ararengukisha uwaciriye igihano, kugira ngo arihe ihadabu n’amagarama mu kiringo ashingira, akabishikiriza ku munwa canke biciye mu rwandiko ruzinze ruri mw’ibahasha ritugaye, kandi rucishijwe mw’iposita ; akaronka n’icemeza ko rwashitse.

Bivuye ku ngigo ishinzwe n’umucamanza canke umukuru wa sentare yaciye urubanza, ukwishuza ihadabu n’amagarama birashobora kuba birahagaritswe.

Imenyeshwa ry’urubanza ryerekana ko ihadabu n’amagarama bitegetswe gutangwa mu ndagano yashinzwe.

Iyo ico kiringo kirangiye uwaciriye igihano atarariha, arapfungirwa ihadabu ritarishwe canke agapfungwa umunyororo w’agatsindikiro.

Ibintu vyanyazwe na Sentare bitangwa hakurikijwe ibitegekanijwe mu gitabu c’amategeko mpanavyaha.

Iyo bigaragaye naho ko umuntu yasinziywe ubuzima kandi akaba yasavye indishi akurikije amategeko, iyo ndishi yose itangwa na Reta.

Mu gihe Reta yahaye indishi uwasinziywe ubuzima, irashobora gushingisha urubanza rwo kwishuza uwakoze ico caha, abo bagikoranye n’ababifisemwo uruhara.

I.2 Ivyerekeye umunyororo w’agatsindikoro.

Nkuko ingingo ya 291 ibivuga, umunyoro w'agatsindikiro werekeye ugupfunga umuntu kugira arihe amafaranga ategerezwa gutanga, ajanye n'igihano yaciriwe. Uwo munyoro usomwa mu rubanza.

Umunyoro w'agatsindikiro ntubuza uwahanywe gusubiza ibintu no gutanga indishi.

Uwaciriwe igihano na sentare mpanavyaha, ni we wenyene ashobora gupfungwa umunyoro w'agatsindikiro. Ba samuragwa biwe, abafise uburenganzira ku matungo yiwe canke abantu baronderwako indishi, ntibashobora gupfungwa umunyoro w'agatsindikiro.

Ikiringo umunyoro w'agatsindikiro umara, giharurwa ku rugero rungana n'amezi atandatu y'umunyoro, ku gihano c'ukuriha amafaranga ibihumbi ijana canke ihadabu ringana n'amafaranga ibihumbi ijana.

Uwahanywe yerekanye ko ata bushobozi afise bwo kuriha ayo mafaranga, ararekurwa amaze gupfungwa umunyoro w'agatsindikiro w'amezi atatu ku gihano c'ukuriha amafaranga canke ihadabu ritarenza 50 000 (amafaranga ibihumbi mirongo itanu) canke umunyoro w'amezi icumu n'abiri ku gihano c'ukuriha amafaranga canke ihadabu rirenga ayo.

Uwahiwe icaha cerekeye ibiturire n'ibindi vyaha bijanye, ntiyigera afatwa nk'uwudafise ubushobozi bwo kuriha nk'uko vyavuzwe mu gahimba ka mbere k'iyi ngingo.

Ingingo ya 295 ya rino bwirizwa yoyo ivuga ko, abana, abasaza bafise imyaka mirongo indwi n'iyirenga canke umuntu agwaye indwara idakira imusinzikaje, yasuzumwe n'umurwi w'abaganga wabisabwe, ntibashobora guhanishwa umunyoro w'agatsindikiro, co kimwe n'umugore afise imbanyi y'amezi atandatu n'ayarenga canke yonsa uruhinja rufise amezi ari musi y'atandatu.

Igihano c'umunyoro w'agatsindikiro ntigishobora gukurikizwa hadaciye iminsi icumi kuva uwahanywe ategetswe kuriha amafaranga bisabwe n'uwumuburanya.

Ugusabira umunyoro w'agatsindikiro uwaciriwe igihano, ntivyemerwa mu gihe ikiringo categekanijwe kugira igihano gikurikizwe caheze. Ico gihe kirangiye igihano c'ugupfungwa uw'agatsindikiro kitaratangura gukurikizwa,ntikiba kigitanzwe.

Nk'uko bitegekanijwe muri iki gitabu c'amategeko, amategeko akurikizwa ku vyerekeye imitahe ikoresha mu butungane, arakurikizwa ku vyerekeye umunyoro w'agatsindikiro.

Uwaciriwe umunyoro w'agatsindikiro apfungirwa mw'ibohero hisunzwe amategeko atunganya amabohero asanzwe akurikizwa.

Iyo amatungo y'uwaciriwe igihano adakwiye kugira arihe ihadabu yaciriwe, asubize ivyatsindiwe yongere atange indishi, aca abanza gusubiza ivyatsindiwe n'ugutanga indishi.

Mu gihe hatangishijwe ihadabu n'amagarama ya Reta, amafaranga arihwa n'abaciriwe ibihano abanza gukurwako ayo magarama ya Reta.

Abantu baciriwe umunyoro w'agatsindikiro bashobora kudapfungwa canke kurekurwa mu gihe barishe amafaranga akwiranye n'umwenda, canke batanze ingwati yemejwe koikwiranye n'uwo mwenda.

Ingwati itegerezwa kugomborwa mu mezi abiri, bitabaye, ingingo y'ugupfungwa uw'agatsindikiro ica ishirwa mu ngiro.

Igihe amafaranga yose atarishwe, igihano c'ugupfungwa uw'agatsindikoro kirashobora gusubira gusabwa hafatiwe ku mafaranga asigaye kurihwa.

I.3 . Ugukoresha ibikorwa vy'iterambere rusangi abahanywe.

Nkuko ingingo ya 301 ya rino bwirizwa ibivuga, amashirahamwe yipfuzwa kuronka uburenganzira bw'ugukoresha ibikorwa vy'iterambere rusangi

abahanywe, abisaba umushikiranganji ajejwe ubutungane, umushikirizamanza mukuru wa Republika wo mu karere ibikorwa bizokorerwamwo, abanje gushikiriza icyo avyiyumvirako.

Mu gusaba ubwo burenganzira hatangwa ibi bikurikira:

1° Ikopi yemewe y'itegeko nshikiranganji ryemerera ishira hamwe gukora;

2° amategeko ngederwako y'ishira hamwe, n'amategeko ntunganyabikorwa yaryo icyo ahari;

3° urutonde rw'ibigo vy'ishira hamwe n'aho bifise icyarwo;

4° izina ry'uwuserukira ishira hamwe imbere y'amategeko, amatazirano yiwe, igenekerezo yavukiyeko n'aho yavukiye; ubwengehugu bwiwe n'icyo akora;

5° ivyegeranyo vy'ivyakozwe n'ishira hamwe ku mwaka ku mwaka, mu myaka itatu iheruka.

Mu gihe vyihutirwa, umushikiranganji ajejwe ubutungane arashobora guha ivy'imfatakibanza ishira hamwe uburenganzira bw'ugukoresha abahanywe bashikirijwe canke vyemejwe n'umushikirizamanza kizigenza wa Republika.

Amashira hamwe yegamiye reta, ahabwa uburenganzira bw'ugukoresha ibikorwa vy'iterambere rusangi abahanywe ataco arinze gusabwa.

Ishira hamwe ryahawe uburenganzira bw'ugukoresha ibikorwa vy'iterambere rusangi, riramenyesha umushikirizamanza mukuru wa Republika igihindutse cose mu vyo ryashikirije, igihe ryasaba ubwo burenganzira.

Mu gihe naho ishira hamwe rikoze ikosari hambaye, umushikiranganji ajejwe ubutungane abashikirijwe n'umushikirizamanza kizigenza wa Republika, ashobora kwaka iryo shira hamwe uburenganzira ryahawe.

Urutonde rw'ibikorwa vy'iterambere rusangi n'ingene birangurwa, bishingwa n'itegeko ry'Umukuru w'igihugu.

Mu guhitamwo ibikorwa vy'iterambere rusangi bikorwa n'abaciriwe ibihano, iri bwirizwa rivuga ko umucamanza yisunga akamaro kavyo mu mibano na kazoza bategurira uwaciriwe igihano mu mibano no kukazi, akisunga kandi n'ivyo bashoboye igihe bazosubira kubana n'abandi.

Ingingo ya 308 ya rino bwirizwa ivuga ko, umushikirizamanza mukuru wa Republika ari we akurikirana irangurwa ry'ibikorwa vy'iterambere rusangi we nyene ubwiwe, canke akabishinga umukozi yagenywe, kugira abirongore yongere asuzume ko vyakozwe ku buhinga butegerejwe.

Uwagenywe ngo arongore ivyo bikorwa, aramenyesha bidatevye umushikirizamanza mukuru wa Republika, ico cose catumye ivyo bikorwa bitarangurwa, n'icononywe n'uwaciriwe igihano canke icamubangamiye mu gihe ariko arakora ibikorwa vy'iterambere rusangi.

Mu gihe ibikorwa vy'iterambere rusangi bidakozwe, umushikirizamanza mukuru wa Republika aca ashira mu ngiro igihano c'ugupfungwa canke c'ugutanga ihadabu gitegekanirijwe uwuhanywe.

Ingingo ya 311 ya rino bwirizwa ivuga ko, umuntu yaciriwe igihano c'imperekeza c'ugukurikiranwa mu mibano no mu butungane, akurikiranwa n'umushikirizamanza mukuru akukira sentare nkuru yaciye ico gihano canke umushikirizamanza mukuru w'akarere igihano kibwirizwa gukorerwamwo.

Mu gihe umuntu yaciriwe igihano c'ugukurikiranwa mu mibano no mu butungane yategetswe kwivuzwa, umushikirizamanza mukuru wa Republika akora ibishoboka vyose ngo avurwe n'ingoga kugira atangure igihano yaciriwe.

Mu gihe naho abona ko bikenewe, umushikirizamanza mukuru wa Republika ashobora gushinga, avyibwirije canke abisabwe n'uwahanywe, ko hasuzumwa

ingene amagara yiwe yifashe, igihe ico ari co cose ariko arakurikiranwa mu mibano no mu butungane.

Mu gihe igihano c'ugukurikiranwa mu bihano no mu butungane kitakurikijwe, umushikirizamanza mukuru wa Republika aca ashinga ko igihano c'ugupfungwa canke c'ugutanga ihadabu cacuwe na sentare gikurikizwa, atomoye imvo zatumye afata iyo ngingo.

Umuntu wese yaciriwe igihano c'ugukurikiranwa mu mibano no mu butungane, ashobora gusaba sentare yagiciye gukurwako bimwebimwe mu bitegekanijwe muri ico gihano.

Mu gihe ivyo bisabwe n'umwana yaciriwe igihano, sentare ishingira ingingo ibanje kwumviriza abavyeyi biwe, umurezi, uwumucungera canke bishobotse uwumufasha mu vy'imibano.

Sentare ibifitiye ububasha yemera kwakira ivyo bisabwa haheze ikiringo c'umwaka umwe ingingo y'ugushinga ico gihano ibaye ntabanduka.

Mu gihe sentare itemeye ivyasabwe, bisubira gusabwa haciye ikiringo c'umwaka umwe kuva ingingo yo kuvyanka ifashwe. N'iyi bisubiye gusabwa ukundi gusha ni ko kw'uko.

Ugukurwako igihano c'ugukurikiranwa mu mibano no mu butungane bisabwa umushikirizamanza mukuru wa Republika, ari na we ashobora gufata ingingoy'ugushinga ko hakorwa itohoza ry'umuhinga, ryunganira idosiye y'uwubisaba iyo bikenewe.

Umushikirizamanza mukuru wa Republika aca arungikira sentare ibifitiye ububasha iyo dosiye yongeyemwo imvo yishimikije.

Sentare yashikirijwe urubanza ifatira ingingo mu ntahe yo mu mwiherero yisunze ivyashikirijwe n'ubushikirizamanza, uwasavye gukurwako igihano canke umushingwamanza wiwe, abanje kwumvirizwa canke atumweko.

I.4. Ivyerekeye ibibujijwe uwahanywe n'ubutungane.

Ingingo ya 317 ivuga ko umuntu wese yafatiwe ingingo zimwaka uburenganzira, ububasha canke ubushobozi mu rubanza rumucira igihano c'imperekeza, ashobora gusaba sentare yaciye ico gihano guhagarika iyo ngingo yose canke bimwe mu biyigize, mbere n'ivyerekeye ikiringo vyomara.

Mu gihe ibisabwa bijanye n'ingingo y'ugukurwako ububasha, uburenganzira canke ubushobozi hakurikijwe ibitegekaniywe mu gitabu c'amategako mpanavyaha, vyerekeye ivyaha bikomeye n'ivyaha bisanzwe bijanye n'ivy'ubutunzi, hamwe n'ivyaha vy'ukutubahiriza amatungo ya Reta, sentare ntishobora guhagarika ingingo kiretse uwubisavye amaze gukora igihano gikuru yaciriwe, yatanze indishi kandi yasubije ibindi bintu bitegerejwe hakurikijwe igihano yaciriwe.

Urwandiko rurimwo ivyasabwe rushikirizwa umushikirizamanza mukuru wa Republika wa sentare ibifitiye ububasha, ruratomora igenekerezo urubanza rwaciriweko hamwe n'ibibanza uwusaba ko igihano ciwe gihagarikwa yikurikiranije kubamwo kuva aho aherukira guhanwa canke kuva arekuwe.

Umushikirizamanza mukuru wa Republika atohoza ivyasabwe, agaca abishikiriza sentare ibifitiye ububasha.

Mu gihe vyasabwe n'umwana yahanywe atarakwiza imyaka y'ukwihagararira imbere y'amategako, sentare ifata ingingo ibanje kwumviriza abavyeyi, umurezi, uwumucungera n'uwumufasha mu vy'imibano, iyo bishobotse.

Mu gihe senatre itemeye ivyasabwe, bisubira gusabwa haciye ikiringo c'umwaka, kuva ingingo yo kuvyanka ifashwe. N'iyi bisubiye gusabwa ukundi gusha, ni ko kw'uko.

Ingingo yafashwe imenyeshwa mu buryo busanzwe bukoreshwa mu kumenyeshya ingingp zifatwa n'ubutungane. Iyo ngingo ni ntabanduka.

Mu gihe ivyasabwe bitemewe, uwasavye gukurwako igihano ategerezwa gutanga amagarama. Ariko, sentare yishimikije ingingo idasanzwe kandi ku mvo zumvikana, irashobora kumukurako ayo magarama yose canke igice cayo.

Ingingo y'ugukura canke kugabanya igihano caka uburenganzira, ububasha canke ubushobozi uwaciriwe igihano yandikwa iruhande y'ingingo imucira urubanza no kw'ifishi y'ivyaha yahaniwe.

III.GUSOZERA

Ncuti bagenzi namwe mwese twarikumwe muri kino kiganiro c'agateka ka zina muntu,twariko turabira hamwe ingingo zivuga ivyerekeye ikurikizwa ry'imanza.Twabonye ko ico cose gikorwa mu butungane kigirwa hisunzwe amategeko.

Ikiganiro c'uno muni munkundire ndakigarukirize ngaha,kuko n'umwanya cagenewe urarangiye . Gédéon NINDAMUTSA nakibashikirije ndabasezeye.